

太原府志卷三十二

名宦

唐虞十二牧治首冀州春秋時晉文公作執秩以正其官悼公卽位官司之長皆民譽也自古吏治循良史不勝紀矣我

皇上澄叙官方太原爲畿輔重地每有選除上廛

宸衷今之官斯土者其皆能爲保障乎誠於聽治之暇取古賢能則而倣之夫誰非晉陽之尹鐸也哉志名宦

魏

魏

梁習字子虞陳郡柘人建安中以別駕司馬領并州刺史時承高幹荒亂之餘張雄跋扈吏民多入其部落兵衆

更相扇動往往某時習到官誘諭招納皆禮召其豪右稍稍薦舉使詣幕府豪右已盡乃次發諸丁彊以爲義從其不從命者與兵致討斬首千數降附者萬計諸部曲服事供職同於編戶魏武嘉之賜爵關內侯建安十八年州并屬冀州更拜議郎西部都督從事統屬冀州總故部曲魏初復置并州習復爲刺史晉申門亭侯政治爲天下最太和二年徵拜大司農習前後在州二十餘年而居處貧窮無方面珍物明帝異之禮賜甚厚四年卒

陳泰字元伯潁川許昌人羣子正始中以遊擊將軍爲并州刺史加振威將軍使持節護匈奴中郎將甚有威惠京邑貴人多寄寶貨因泰市奴婢泰皆挂之於壁不發

其封及徵爲尙書乃悉還之終尙書左僕射贈司空諡
穆

孫禮字德達涿郡容城人齊王時忤曹爽以并州多邊寇
繇城門校尉除并州刺史加振威將軍使持節護匈奴
中郎將入爲司隸校尉禮凡臨七郡五州皆有威信遷
司空封大利亭侯諡曰景

晉

魯芝字世英扶風郡人魏時爲使持節領護匈奴中郎將
振威將軍并州刺史以綏緝有方遷大鴻臚封陰平伯
晉初進侯卒諡曰貞

石鑿字林伯樂陵厭次人雅志公亮魏初爲并州刺史假
節護匈奴中郎將晉元康初爲太尉卒諡元

劉琨字越石中山魏昌人少與范陽祖納俱以雄豪著名
永嘉元年爲并州刺史加振武將軍領匈奴中郎將時
東嬴公騰自晉陽鎮鄴并土饑荒百姓隨騰南下餘戶
不滿二萬寇賊縱橫道路斷塞琨募得千餘人轉鬪至
晉陽剪除荆棘收葬枯骸造府朝建市獄寇盜互來掩
襲恒以城門爲戰場百姓負楯以耕屬韃而耕琨撫循
勞來甚得物情劉元海時在離石相去三百餘里琨密
遣離間其部降者萬餘落元海甚懼遂城蒲子而居之
在官未期流人稍復琨父蕃自洛赴之人士奔并者多
歸於琨琨善於懷撫而短於控御一日之中雖歸者數
千去者亦以相繼劉粲乘虛襲陷之琨父母並遇害琨
志在復讐而屈於力弱愍帝初拜大將軍都督并州諸

軍事加散騎常侍假節琨累上表謝辭甚悲壯三年遣大鴻臚趙廉持節拜司空都督并冀幽三州諸軍事表讓司空受都督尅期與倚盧舉兵會倚盧卒石勒攻樂平箕澹大敗琨蹙不能復守遂走飛狐後爲段匹磾所害贈侍中太尉諡曰愍琨在晉陽嘗坐圍城中窘迫無計琨乃乘月登樓清嘯賊聞之皆悽然長歎中夜奏胡笳賊又流涕歔歔有懷土之恩向曉復吹之賊並棄圍而走

北魏

安同遼東人太宗時持節巡察并定二州宣詔撫慰問其疾苦料舉守宰不法郡國肅然卒贈高陽王諡恭惠

元齊

慕容紹宗太原王恪後也以軍功封索盧縣子晉侯累遷并州刺史歸高祖仍加恩禮軍謀兵畧時參預焉高祖末命世宗云侯景若反以慕容紹宗當之後果立功效卒贈太尉諡景惠

高潛神武第十子少明慧天保初封任城王鎮晉陽總兵省事歷司徒太尉并省錄尚書事天統三年拜太保并州刺史時有婦人臨汾水浣衣有乘馬人投其靴而去者婦人持靴詣州言之潛召城外諸嫗以靴示之給曰有乘馬人在路被賊劫害遺此靴焉得無親屬乎一嫗撫膺哭曰兒昨着此靴向妻家如其語捕獲之時稱明察

高長恭文襄第四子封蘭陵王累遷并州刺史突厥入晉

陽長恭盡力擊之前後以戰功別封四郡公長恭面柔
心壯音容並美戰輒戴假面具爲將躬勤細事雖一瓜
數果必與將士共之芒山大捷武士共歌謠爲蘭陵王
入陣曲威震敵國卒贈太尉諡武

段韶字孝先姑臧武威人榮長子也少工騎射有將才世
宗時留鎮晉陽行并州刺史天保四年封平原郡王韶
爲政舉大綱不存小察甚得民和累以軍功晉位太師
邙山之捷又除右丞相以疾卒諡忠武

北周

宇文神舉太祖之族子高祖東伐韶神舉從軍并州平卽
授并州刺史加上開府儀同大將軍并州齊氏別鄰控
帶要重平定甫爾民俗澆訛豪右之家多爲姦猾神舉

勵精爲治示以威恩旬月之間遠邇悅服晉柱國大將軍封東平郡公宣政元年以平寇功授并潞肆石等四州十二鎮諸軍并州總管

隋

李雄字毗盧趙郡高邑人隋初晉王廣出鎮并州以雄爲河北行臺兵部尙書上謂雄曰吾兒少未更事以卿兼文武才今推誠相委吾無北顧之憂矣雄當官正直王甚敬憚吏民稱焉歲餘卒於官

柳彧字幼文河東解人隋初累拜治書侍御史開皇末持節巡省河北五十二州奏免贓污不稱職者二百餘人州縣肅然莫不震懼仁壽初復持節巡省太原道十九

州

豆盧毓字道生昌黎徒河人楚國公勣子少英果有氣節漢王諒出鎮并州毓以妃兄爲王府主簿以從征突厥功授儀同三司及諒謀發兵毓苦諫不從因謂弟懿曰吾匹馬歸朝自得免禍此乃身計非爲國也今且僞從以思後計後諒出城將往介州毓與司馬皇甫誕等閉門拒諒部分未定諒覺廻兵襲擊之毓遂見害諒平詔贈大將軍諡愍

皇甫誕字元盧安定烏氏人剛毅有器局漢王諒爲并州總管以公方選拜并州總管府司馬總府政事一以諮之諒甚敬焉煬帝初諒謀發兵叛誕數諫不納因流涕曰竊料大王兵資無敵京師者加以君臣定位逆順勢殊士馬雖精難以取勝願王奉詔入朝守臣子之節必

有喬松之壽累代之榮如更遷延陷身叛逆一挂刑書
求爲布衣黔首不可得也敢以死請諒怒囚之及楊素
兵將至諒屯清源拒之主簿豆盧毓出誕于獄同謀閉
城拒諒諒擊破之並抗節遇害詔贈柱國諡明

獨孤楷字修則歷官三州總管有惠政大業初轉并州總
管遇疾喪明上表乞骸骨上曰公先朝舊臣歷職二代
高風素望卧以鎮之無勞躬親簿領也遣其長子凌雲
監省郡事數載轉長平太守卒諡恭

唐

劉政會滑州胙城人隋大業中爲太原鷹揚府司馬高祖
爲太原留守政會隸麾下制王威高君雅政會功也武
德初授衛尉少卿留守太原調輯戎政遠近悅服劉武

周進逼并州晉陽豪民薛深等以城應賊政會爲所擒
審表論周武形勢賊平封邢國公卒諡襄

竇靜字元休岐州平陸人抗子武德初累轉并州大總管
府長史時突厥數爲邊患軍糧不屬靜表請太原置屯
田以省餽運歲收粟十萬斛高祖善之令檢校并州大
總管靜又請斷石嶺關以爲障塞復從之封信都男歷
遷民部尙書卒諡肅

李神符高祖從父弟封襄邑王武德四年爲并州總管
利來寇出兵戰於汾水東敗之又勝於沙河之北累遷
開府儀同三司卒

劉世讓醴泉人高祖時爲檢校并州總管突厥入寇馳騎
八百赴之敵軍大至乃保武川立柵遏拒敵使其友鄭

飛瑯來說世讓叱曰丈夫柰何爲賊作說客耶敵遂引去

李勣字懋功曹州離狐人本姓徐以軍功授光祿大夫行并州大都督府長史封英國公在并十六年令行禁止號爲稱職太宗謂侍臣曰隋不能精選賢良安撫邊境惟解築長城以備突厥情識之惑一至于此朕今委任李勣于并州遂使突厥畏威遁走塞垣安靜豈不遠勝築長城耶累拜尚書左僕射卒贈太尉諡貞武

李大亮涇陽人貞觀八年爲河東道行軍總管有蜀渾山之捷威名大著

李義琰魏州昌樂人舉進士補太原尉時李勣爲并州都督寮吏皆望風懼義琰獨廷折曲直勣甚禮之累

中書侍郎以銀青光祿大夫致仕卒

李嗣真趙州人永徽初以御史中丞巡撫河東薦宋溫瑾
袁嘉祚李日知授州縣職皆至顯官及來俊臣用事上
書諫不納出爲潞州刺史

韓思彥南陽人高宗時以監察御史爲并州道巡按使時
有冤獄訊掠已服思彥獨疑之集兒童數百晨入暮出
物色推訊遂得殺人真盜

裴懷古壽春人并州大都督府長史弭亂辨枉民吏愛慕
神龍申遷左羽林大將軍行未達都復授并州長史夷
民間懷古還老幼歡迎時崔宣道代爲并州下車而罷
出郊以候懷古恐傷宣道意命官吏驅逐出迎人百姓
奔赴愈衆其爲人所思如此俄轉幽川都督卒

崔神慶義元次子舉明經則天時拜并州長史因謂曰并州朕之枌榆又有軍馬比日簡擇無如卿者因自爲按行圖擇日而遣之神慶到州有豪富僞作改錢文勅文書下州穀麥踊貴百姓驚擾神慶執奏以爲不便下制褒賞之先是并州有東西二城隔汾水神慶始築城相接每歲省防禦兵數千人卒贈幽州都督

魏元忠宋州宋城人聖歷二年拜鳳閣侍郎同平章事檢校并州長史相王爲并州元帥又以元忠爲副時奉宸令張易之嘗縱其家奴凌暴百姓元忠笞殺之權豪莫不敬憚神龍初復知政事封齊國公卒諡貞

張嘉貞蒲州猗氏人則天末累遷并州長史爲政嚴肅甚爲民吏所畏時突厥新附散居太原以北嘉貞奏請置

軍以鎮之於是始於并州置天兵軍以嘉貞爲使累遷中書令封河東侯卒諡恭肅

張說字道濟洛陽人對策一等累拜中書令封燕國公開元七年檢校并州長史兼天兵軍大使時朔方軍大使王駿誅河曲降賊阿布思九姓同羅拔曳固等疑懼說持節從輕騎二十直詣其部宿帳下名見曾豪慰安之由是九姓遂安卒贈太師諡文貞

崔隱甫貝州武城人爲殿中侍御史以劾浮屠惠範貶開元九年拜太原尹民刻石頌其美政十八年入歷御史大夫威名赫然以憂去二十四年起爲太原尹仍爲河東採訪處置使卒諡忠

崔日用滑州靈昌人舉進士爲并州大都督府長史卒并

人懷其惠吏民數百皆縞服送喪諡昭

韋湊字彥宗京兆萬年人開元十年拜太原尹兼節度支
度營田大使又兼北都軍器監邊備修舉詔賜時服勞
勉之卒諡文

李暉淮安王神通元孫開元中爲太原尹仍充太原以北
諸軍節度使太原舊俗有僧徒以習禪爲業及死不殮
但以屍送近郊以飼鳥獸如是積年土人號其地爲黃
坑暉到官申明禮憲期不再犯其風遂革累封武都縣
伯卒

王駿景城人明皇時爲并州都督長史請置降人於河南
以遠邊患書未報而叛駿邀擊斬獲數千級

郭子儀華州鄭縣人以武舉高等累陞河東副元帥上元

三年河中軍亂殺其帥李國貞時太原節度鄧景山亦爲部下所殺乃以于儀爲朔方河中等處節度兼興平定國副元帥封汾陽郡王屯絳州上引至卧内曰河東事一以委卿三月至絳擒殺賊首王元振數十人太原辛雲京聞之亦誅害景山者河東諸鎮皆惕息德宗卽位罷副元帥廣德二年僕固懷恩護回紇歸國道太原節度使辛雲京疑可汗見襲閉關不敢犒軍懷恩大怒頓軍汾州使裨將李光逸以兵守祁顏真卿言懷恩將士皆郭子儀舊部若使子儀代之必相從而歸乃命兼河東副元帥河中節度觀察使鎮河中懷恩子瑒攻榆次未拔追兵于祁責其緩鞭之是夕偏將焦暉等斬其首懷恩與部曲三百渡河走靈武德宗卽位進位太尉

中書令卒贈太師謚忠武

李光弼營州柳城人楷洛子嚴毅沈果有大畧祿山之亂郭子儀薦光弼堪闡寄天寶十五載正月爲雲中太守攝御史大夫充河東節度副使知節度事肅宗起兵靈武授戶部尚書兼太原尹北都留守以景城河間卒五千赴太原時賊將史思明蔡希德等四僞帥率衆十餘萬來攻太原光弼經河北苦戰精兵盡赴朔方麾下皆烏合衆不滿萬人思明謂諸將曰光弼兵寡弱可屈指取太原鼓行而西圖河隴朔方無後顧矣光弼部將聞之皆懼議欲修城以待光弼曰城周四十里賊垂至興役是未見敵而自疲矣乃躬率士卒百姓於城外掘壕自固增壘於內壞輒補之賊逼城發強弩機石賊驍勁

卒死者十二三城中長幼皆服其勤智懦兵增氣皆欲
出戰思明揣知先歸留蔡希德等攻之月餘率敢死士
出擊大破之斬首七萬餘級賊始至及遁五十餘日光
弼設小幕宿於城東南隅有急卽應行過府門未嘗廻
顧賊退三日決軍事畢始歸府第寶應元年封臨淮郡
王贈太保諡武穆

王思禮高麗人乾元二年爲太原尹北京留守河東節度
副大使卒贈太尉諡武烈思禮持法嚴整士不敢犯在
太原器甲完精儲粟至百萬斛云

張延賞猗氏人嘉貞子乾元二年王思禮守北都表爲太
原少尹兼行軍司馬北都副留守卒諡成肅延賞歷四
鎮所至民頌其愛

馬燧字洵美汝州郟城人父季龍嵐州刺史燧沉勇多算
寶應中澤潞節度使李抱玉署爲趙城尉燧因進說曰
僕固懷恩將必窺太原當爲備抱玉令燧說相衛薛嵩
告絕於懷恩卽署燧左武衛兵曹參軍累遷河東節度
使時太原承鮑防之敗兵力衰弱燧募廩役得數千人
悉補騎士教之戰數月成精卒造鎧必短長三制稱上
所衣以便進趨爲戰車冒以狻猊象列戟於後行以載
兵止則爲陣遇險則制衝冒器用完銳威震北方以功
封北平郡王時邊塞數有警燧念晉陽王業所基宜固
險以示敵乃引晉水架汾而屬之城濬爲東隍省守陴
萬人後拜司徒兼侍中卒贈太傅諡莊武

辛雲京蘭州金城人有膽決以節度使兼太原尹封金城

郡王雲京質性沉毅部下有犯令者不貸絲毫其賞功效亦如之故三軍整肅回紇恃舊勲入界輒肆狼貪至太原不敢惕息數年太原大治無烽警虞卒贈太尉諡忠獻

李景畧幽州良鄉人以殿中侍御史兼豐州刺史西受降城使回紇使至與刺史抗禮時梅錄將軍入朝景畧計伏之梅錄氣索不敢抗以父行呼景畧自此使皆拜於庭威名顯聞杜希全忌之誣貶袁州司馬河東李說有疾詔爲太原少尹節度行軍司馬將代說時司馬多代節度會梅錄復入朝說大會虜爭坐不敢遏景畧叱之梅錄識其聲驚拜曰非李豐州耶遂就坐將吏相顧嚴憚說愈不平計轉景畧爲豐州刺史兼天德軍西受降

城都防禦使邊塞苦寒土瘠人貧景畧節用約已與士同甘苦軍聲雄冠北邊後卒於鎮贈工部尚書天下皆惜未盡其能云

李自良兗州泗水人以檢校工部尚書充河東節度使居治九年舉不愆法簡儉易循民不知有軍上下諧附卒於官贈尚書左僕射

令狐楚字愨士貞元七年進士才思俊麗自李說嚴綬鄭儋相繼鎮太原皆辟爲從事累遷殿中侍御史德宗好文每太原奏至能辨楚所爲數稱之鄭儋在鎮暴卒不及占後事軍中諠譁將有急變中夜十數騎持刀迫楚至軍門草遺表諸將圍視楚色不變搦管卽成讀示三軍無不感泣軍情乃安後爲太原尹北都留守河東節

度等使楚始自書生隨計成名皆在太原實如故里及是秉旄作鎮邑老歡迎楚撫慰有方軍民胥悅入爲吏部尚書封彭陽郡公卒贈司空諡文

嚴綬蜀人以檢校工部尚書兼太原尹御史大夫北都留守充河東節度使在鎮九年爲政寬惠士馬蕃息境內稱治後拜太傅卒贈太保

裴向字依仁河中河東人遵慶子德宗末選爲太原少尹尋改汾州刺史轉鄭州又復爲太原少尹兼河東節度副使向歷官仁智愛利及民歷戶部尚書致仕

裴度聞喜人第進士元和十四年檢校左僕射同中書門下平章事太原尹北都留守河東節度使長慶元年改東都留守開成二年復以中書令兼太原尹北都留守

河東節度使上諭曰爲朕卧護北門可也趣上道度之
鎮遣使曉譬易定張元益束身歸朝四年以疾還東都
鎮拜中書令卒諡文忠

盧鈞字子和范陽人元和中進士從裴度爲太原觀察支
使遷監察御史白宋申錫之枉由是知名大中六年進
檢校司空太原尹北都留守河東節度使卒贈太傅諡
元

韋宙京兆萬年人丹子盧鈞鎮太原表爲節度副使時回
鶻破諸部入塞下宙徧見酋豪撫諭之約束不得擅以
兵侵諸戎犯者死於是三部六番諸種皆信悅累官嶺
南節度同平章事

崔戎字可大博陵人元暉從孫兩舉明經裴度鎮太原書

爲叅謀令戎至鎮州往諭王承宗承宗泣下歷遷兗海
密沂都團練觀察使卒贈禮部尚書

李程字表臣隴西人襄邑王神符後登進士寶歷二年出
爲檢校兵部尚書同平章事太原尹北京留守河東節
度使卒諡繆

劉沔字子汪徐州彭城人會昌二年拜河東節度兼招撫
回鶻使檢校尚書左僕射太原尹北京留守進屯雁門
關雲州寇警沔擊之斬七裨將以還太和公主功進檢
校司空後以病致仕卒贈司徒

柳公綽字起之解人家華原舉賢良方正太和四年檢校
左僕射太原尹北都留守河東節度觀察等使遭歲歉
樽節用度輟宴飲衣食與士卒均北部梅錄將軍李暢

以馬來市使牙將祖考恭單馬勞問暢感義出涕陘北
沙陀諸部長之公綽名其酋朱邪執宜抵雲朔塞下治
廢柵十一募兵三千付之留屯塞上其妻母來太原者
令妻梁國夫人飲食問遺之沙陀感恩深得其效以病
還京師授兵部尙書卒諡成

李石字中玉隴西人襄邑王神符後登進士太和五年令
狐楚節度河東引爲副使會昌三年加檢校司空河東
節度使後以太子太保分司東都卒

李載義常山愍王之後太和七年爲北都留守兼太原尹
河東節度觀察處置等使回鶻使入朝所至強暴時李
暢曉華語益恣肆載義召與語曰可汗使將軍朝貢以
固甥舅之好不容將軍暴也朝廷厚饗餼以禮容有不

至吏皆坐死若將軍部伍不戢剽掠廬舍載義必殺爲盜者將軍其戒之罷防守之兵使兩卒伺其門暢嚴憚訖不敢犯令卒贈太尉

盧簡求字子臧蒲州人長慶初進士辭翰縱橫長於應變會昌十四年爲太原尹北都留守充河東節度觀察等使太原軍素管吐渾契苾沙陀三部落前政或要盟誓或質子弟簡求開懷撫待接以恩信所質子弟一切遣之三部欣然聽命卒贈尙書左僕射

裴休字公美聞喜人家濟源長慶中登第大中十三年加檢校吏部尙書太原尹北都留守河東節度觀察等使卒贈太尉休性寬惠爲官不尙曠察而吏民畏服

劉瑑字子全彭城人開成初進士大中十一年檢校禮部

尚書太原尹北都留守河東節度觀察等使十二月入朝始瑑在翰林上素器遇至是手詔追還外無知者既發太原人方大驚遂由戶部侍郎同平章事

畢誠字存之鄆州須昌人太和中進士大中末召問邊事誠列破羌狀上悅曰不期頗牧在吾禁中命爲太原尹北都留守河東節度使明賞罰謹斥堠修杷頭七十烽期年諸部革心就加尚書左僕射

劉瞻字畿之彭城人大中進士咸通中爲太原尹河東節度使性廉約終始完潔

鄭從謹字正求滎陽人僕射餘慶孫登進士咸通中爲河東節度使徙宣武以善最聞時沙陀李國昌入據雲朔等州南畧大谷而河東節度使康傳圭又爲部下張彥

球所殺軍士益驕朝廷難於擇帥詔從謹檢校司徒以宰相秩復爲河東節度兼行營招討使詔自擇叅佐乃奏王調爲副使劉崇龜爲節度判官趙崇爲觀察判官劉崇魯充推官李渥充書記崔澤充支使開幕之盛冠於一時中朝人士目河東爲小朝廷言得才多也時承新亂探掠日旁午從謹沉機善斷奸無遁情搜其魁誅之以彥球本善意且才可任釋不問而付以兵故得其死力賊發輒得羣豪揚息會黃巢犯闕從謹首倡仗義遣牙將論安等從諸葛爽赴難而李克用謂太原可乘以兵奄至營于汾東從謹具厚餼犒勞克用陰縱其下肆掠從謹追安使與大將王蟾高弁等踵擊會振武契苾通兵至沙陀大敗引還中和二年詔赦沙陀鄜使

討賊自贖沙陀兵不敢蹈境惟克用從數百騎臨城叙別從讜以名馬器幣歸之明年賊平詔克用代領河東從讜卽日以監軍周從寓知兵馬留後掌書記劉崇魯知觀察留後勅克用至按籍付之名拜司空復秉政進太傅卒諡文忠從讜進止有禮法性不矜滿沈毅有謀初盜流中原沙陀彊悍而卒收其用者從讜之力也

崔彥昭字思文清河人大中進士治郡有聲十一年檢校刑部尚書太原尹北都留守河東節度使時邊塞多警沙陀諸部動干紀律彥昭柔以恩惠示以兵威三年間北門大治軍民歌之考滿受代者老數千詣闕乞留詔留任乾符初同平章事罷相分司卒

崔瑱博陵人河東節度使兄弟八人皆有才世擬荀氏八

龍

李襲吉乾符中舉進士爲河東節度使爲人恬淡其書多傳於世

劉崇龜字子長滑州胙人第進士廣明元年鄭從讜鎮太原奏爲節度判官累遷清海軍節度使卒崇龜蒞政號精明

後唐

張憲莊宗時爲北京留守莊宗及難鄴中兵士推戴明宗張昭謂憲曰得毋奉表勸進爲自安之計乎憲曰我本書生見知主上位至保釐乃布衣之極苟覩顏求生何面目見主於地下昭曰此古人之志也公能行之死且不朽矣相泣而去憲遂死之時論重昭能成憲之節

段希堯河內人晉高祖爲河東節度使以希堯爲判官高祖將舉兵與賓佐謀希堯以爲不可高祖雖不聽然重其爲人不之責也累遷禮部尙書卒

宋

潘美字仲詢大名人太平興國四年爲北路都招討判太原行府事兼三交都部署留屯以捍北邊三交西北三百里名固軍其地險阻爲北邊咽喉美潛師襲之遂據有其地因積粟屯兵以守之自是北邊以寧卒贈中書令諡武惠

王嗣宗汾州人開寶八年進士第一至道中爲河東轉運使咸平中知并州兼并代部署州境有卧龍王廟每窮冬闔境致祀值風雪嚴寒老幼踣于道嗣宗亟毀之有

詔褒美仕至樞密副使卒諡景莊

高瓊濠州蒙城人太宗朝爲并州馬步軍都部署時潘美在太原舊制節度使領軍職者居上瓊以美舊臣奏請居其下從之戍兵有以廩食陳腐譁言者瓊知之適出巡諸營士卒方聚食因取其飯自啖之謂衆曰今邊鄙無警爾等坐飽甘豐宜知幸也衆言遂息尋改鎮州部署真宗初復任并代部署轉運使言其政績詔褒之咸平三年召還景德北巡力勸渡河授檢校太尉忠武軍節度使卒贈侍中

王陟上黨人淳化進士補嵐州團練推官咸平初以太常博士爲河東轉運使賜金紫屢遣裁度邊事趙保吉納歎正其經界代歸卒

向敏中字常之開封人太平興國五年進士咸平初命爲河北河東安撫大使所至訪民疾苦宴犒官吏莫不感悅四年同平章事出知永興遂定趙德明誓約晉左僕射卒諡文簡後封燕王

姚鉉字寶之廬州合肥人太平興國進士至道中爲河東轉運使上言曰伏見諸路官吏或強明蒞事惠愛及民者則必立教條除其煩擾然狡胥之輩非其所便候其罷官悉藏記籍欲望所在官吏有經畫利濟事可長久者歲終書歷受代日錄付新官俾之遵守若事有非者便聽上聞俟報改正詔從之終起居舍人鉉嘗纂唐文粹云

李若拙字藏用京兆萬年人舉進士太平興國中以右補

闕同勾當河東轉運兼雲應等八州事嘗詣闕言邊事
太宗嘉之

錢若水字澹成河南新安人幼聰悟陳搏見之曰子神清
可以學道不然當富貴但忌太速耳雍熙中第進士咸
平中拜并代經畧使知并州事以疾卒贈戶部尙書

宋搏字鵬舉萊州掖人開寶中得第真宗朝爲河東轉運
使上言大通監冶鐵盈積可備諸州軍數十年鼓鑄願
權罷採紆民又請料諸州丁壯爲兵以增戎備在任凡
十一年時河東邊事未息屯師尙廣搏經制漕運以幹
治稱後使遼卒

陳堯佐字希元閬州閬中人父省華樓煩令堯佐進士及
第真宗時爲河東路轉運使以地寒民貧俸石炭以生

秦除其稅又減澤州大廣冶鐵課數十萬仁宗時知并州每汾水暴漲州民輒憂擾堯佐爲築堤植柳萬株作柳溪民賴其利入拜同平章事致仕卒諡文惠

李若谷字子淵徐州豐人第進士真宗時知并州民貧失婚姻者出私錢助其嫁娶贅婿亡賴委妻去爲立期不還許更嫁并多降人喜盜竊若谷籍累犯者三人爲保有犯并坐之俊者削去籍名尋拜參知政事致仕卒諡

康靖

張進兗州曲阜人咸平三年任并代副都部署李繼遷寇麟州州將遣單介間道乞師太原諸將以無詔旨猶豫未決進獨抗議發兵赴援旣至而圍解手詔褒美景德元年卒上遣中使護喪還京

劉綜虞鄉人第進士景德四年出知并州以政績聞州民乞留綜強敏有吏材所至抑挫豪右振舉文法時稱幹治

薛映汾陽人第進士爲河東轉運使兼河西隨軍求便親知相州後以尚書左丞知并州累拜禮部尚書卒諡文恭映爲治嚴明吏不能欺每五鼓冠帶黎明據案決事雖寒暑無一日異也

文彥博字寬夫介休人第進士天聖中以殿中丞署榆次縣事遷河東轉運副使鄜州餉道回遠銀城河外有唐時故道廢勿治彥博父洎爲轉運使日將復之未及而卒彥博嗣成父志益儲粟元昊來寇圍城十日知有備解去至和二年拜同平章事久之出封潞國公尋以尚

太原府志 卷三十二
書左僕射判太原府治平中入爲樞密使凡九年引去
拜河東節度使元祐五年以太師致仕諡忠烈

杜衍字世昌越州山陰人第進士提點河東路刑獄尋以
工部侍郎知并州元昊拒命以太原要衝加龍圖閣學
士爲河東宣撫使遼夏戰黃河外火山保德軍皆警衍
曰二國方交鬪勢必不來我兵不可妄出旣而果驗封
祁國公卒諡正獻

韓琦字稚圭相州安陽人舉進士第二慶歷中以武安軍
節度使知并州始潘美鎮河東患寇抄令民悉內徙而
空塞下不耕於是忻代寧化火山之北多廢壤琦以爲
此皆良田不耕適足以資敵遂請距北界十里爲禁地
其南則募弓箭手居之墾田至九千六百頃嘉祐三年

拜同平章事治平中封魏國公卒贈尚書令諡忠獻

歐陽修字永叔廬陵人舉天聖進士試南宮第一慶歷中以知諫院奉使河東上言代州岢嵐多禁地廢田願令民得耕之不然將爲敵有朝廷下其議久乃行歲得粟數百萬斛凡河東賦歛過重民所不堪者奏罷十數事移河北都轉運使嘉祐五年拜樞密副使六年晉參知政事卒諡文忠修歷數郡寬簡而不擾所至民便之

唐介字子方江陵人第進士天下稱真御史以直集賢院爲河東轉運使治平二年以龍圖學士知太原府上曰朕視河東不在中執法下誓煩卿往耳夏人數擾代州邊多築堡境上介遣兵悉撤之移檄諭以利害遂不敢動卒諡賢肅

張孜仁宗時并州副總管河東更鐵錢法人情疑貳兵相率叩府欲訴幾爲亂孜策馬往諭之皆散還營

張奎字仲野臨濮人第進士爲并州推官以待御史爲河東轉運使又以天章閣待制爲河東都轉運使終樞密直學士奎風力精強所至有治蹟吏不敢欺與弟亢皆知名一時云

范仲淹字希文蘇州吳縣人舉禮部第一遂第進士慶歷中拜樞密副使改參知政事爲河東陝西宣撫使至汾州民遮道數百趨訴仲淹以付張燾奕局未終處決已竟後以戶部侍郎知潁州卒諡文正

司馬光字君實夏縣人第進士以集賢校理從龐籍辟通判并州麟州屈野河西多良田夏人蠶食其地爲河京

患籍命光按視光建言築二堡募民耕之耕者衆則糴
賤亦可漸紓河東貴糴遠輸之憂籍從其策而河東有
餘粟仕至左僕射卒贈太師諡文正

王德用字元輔趙州人超子天聖中爲并代州馬步軍副
都總管累官知樞密院遼使耶律防曰天子以公典樞
而用富公爲相將相皆得人矣卒諡武恭

陳貫字仲通自安陽徙河陽第進士歷河東轉運使貫蒞
官嚴檢覈嘗曰視縣官物如已物容有好乎

賀鑄字方回衛州人工長短句隸籍右選監太原工作有
貴人子同事驕倨不相下鑄廉得其盜工作物甚悉閉
之密室數而杖之數十貴人子叩頭求哀卽大笑釋去
自是諸挾氣力頡頏者皆側目不敢仰視

王沿字聖源大名館陶人第進士累官河東都轉運使加龍圖閣直學士知并州時元昊數寇河東建議徙豐州不報已而州果陷

何鄰字聖從成都人第進士仁宗時爲河東都轉運使故相梁適帥太原病不能事內臣蘇安靜鈐轄兵馬怙寵不法皆劾奏之致仕卒

張景憲字正國河南人師德子以集賢殿修撰爲河東都轉運使議者欲分河東爲兩路景憲言本道地肥磽相襍州縣貧富亦異正宜有無相通分之不便議遂寢景憲居官不畏強禦爲世所稱

周沆字子真青州益都人仁宗時第進士以直史館爲河東轉運使盜鑄鐵錢法不能禁沆高估錢價鑄者無以

自利乃息後再爲河東轉運使以戶部侍郎致仕卒
明鎬字化基密州安邱人第進士爲河東都轉運使修建
寧中候百勝砦鎮川清塞堡凡五城踰年擢龍圖閣學
士知并州鎬大巡邊以備賊時邊任多純袴子弟取尤
不職者杖之疲軟者皆自解去先是軍行妓者多從鎬
欲驅逐惡傷士卒心會有忿爭殺妓女吏執以白鎬曰
彼來軍中何耶縱去不治妓聞皆散去後入爲叅知政
事卒諡文烈

鄭戩字天休蘇州吳縣人師事楊億舉進士甲科仁宗時
爲資政殿學士累知并州道改鄆又以大學士知并州
遼方與元昊交兵邊奏互上獨戩不以聞詔遣使問之
對曰敵自相攻中國不足憂也卒諡文肅

張若谷字德繇南劍沙縣人第進士仁宗時以右諫議大夫知并州所至有循良蹟不激許取名云

程師孟字公闢吳人第進士提點河東路刑獄勸民出錢開渠築堰溉良田萬八千頃仕至集賢殿修撰卒師孟累領劇鎮爲政簡而嚴發隱摘伏如神所部肅然

梁適字仲賢東平人顛子舉進士累遷觀文殿大學士夏人盜耕屈野河西田累年朝廷欲正封以適爲定國軍節度使知并州至則悉復侵地六百里進太傅卒諡莊掌禹錫字唐卿許州鄆城人第進士通判并州累官提點河東刑獄以工部侍郎致仕卒禹錫矜慎畏法好儲書所記極博撰皇祐方域圖志地理新書於河東亦有禪

齊恢字熙業蒲陰人第進士英宗時提點河東路刑獄凡公幣格外餽餉之物一無所受臨政簡約不苛民甚愛之

孫長卿字次公揚州人英宗時爲河東都轉運使長卿長於政事性廉潔不以一毫取諸人其卒也詔中使護其喪歸葬

閻詢字議道鳳翔天興人第進士以直龍圖閣爲河東轉運使言三路土兵疲老者聽其族以強壯代從之仕至右諫議大夫卒

王安禮字和甫臨川人安石弟早登科從河東唐介辟熙寧中鄜延路城囉兀河東發民四萬負餉宣撫使韓絳檄使佐役帥呂公弼將從之安禮爭曰民兵不習武事

今毆之深入此不爲寇所乘則凍餓而死耳宜亟罷遣
公弼用其言民得歸而他路遇敵者皆覆公弼執安禮
手言曰四萬之衆豈偶然哉果有陰德相與共之絳上
最多失實公弼以狀聞詔卽河東議功公弼將受之安
禮曰宣撫使以宰相節制諸道且許便宜封授一有不
臆人猶得非之公藩臣乃欲踰進功狀干非其任耶公
弼遽辭遂薦安禮于朝授著作佐郎紹聖三年知太原
府苦風痺卧帳中決事下不敢欺

劉庠字希道彭城人第進士熙寧初除河東轉運使計一
路之產鐵利爲饒請復舊冶鼓鑄通隰州鹽礬博易以
濟用請募民入粟塞下預爲足食計移河北又爲河東
都轉運使後以論新法忤王安石爲龍圖閣直學士知

太原府元祐中加樞密直學士卒

李師中字誠之楚邱人第進士熙寧初爲河東都轉運使
呂惠卿忌之貶卒師中居官明恕去日民擁道遮泣馬
不得行杜衍范仲淹富弼皆薦其有王佐才云

陳安石字子堅河陽人貫子鎖廳及第熙寧中韓絳鎮太
原議行鹽法與監司多不合以安石爲河東都轉運使
議始定謂其僚曰興事當有漸急則擾乃出鹽付民而
給之券使隨取得貿易鬻畢而歸券私販爲減後爲龍
圖閣直學士卒

孫覽字傳師高郵人覺弟第進士神宗時爲河東轉運副
使又以龍圖閣直學士知太原府夏人據橫山並河爲
寨覽謀復取葭蘆成險阻夏人數萬屯境上覽奮擊敗

之遂城葭蘆而還策勲加樞密直學士卒

張商英字天覺蜀州新津人負氣傲儻豪視一世元祐初提點河東路刑獄大觀四年除中書侍郎遂拜尚書左僕射變蔡京政時稱忠直卒贈太保諡文忠

崔暉長安人進士及第累官河東轉運使會更錢法潞州大擾推其首惡誅之人心遂定

馬默字處厚單州城父人第進士受學於石介元祐中爲河東轉運使時議棄葭蘆吳堡二砦默奏不可由是二砦得不棄卒贈太保

陳次升字當時興化仙游人第進士元祐中提點河東刑獄嘗累論章惇蔡卞曾布蔡京語尤切直

畢仲游字公叔雲中人士安曾孫第進士元祐中提點河

東刑獄時韓縝以故相在太原按視如列郡縝奴告有
卒剽其衣於公堂之側縝怒將置卒於理仲游曰奴衣
服尠薄而敢掠之於帥牙非人情取以付獄治卒得免
太原銅器名天下獨不市一物懼人以爲矯將行買二
茶七而去縝曰如公叔可謂真清矣

賈崑字民瞻開封人神宗時爲河東將敗西夏兵於明堂
川崑在行間二十年有智畧能撫御士卒所嚮輒勝

陶節夫字子禮饒州鄱陽人第進士徽宗時以龍圖閣學
士知太原府羣盜李勉起遼州北平之間河東河北騷
動兩路帥臣憲臣皆罪去至出臺郎督捕之節夫請悉
罷所遣兵卒以計獲勉

吳時字伸道邛州人第進士徽宗時以太常少卿提點河

東常平歲饑發公粟以賑民童貫經畧北方每訪以邊事輒不答

張孝純靖康元年爲河東安撫使知太原府三月加資政殿學士九月丙寅城陷爲金所執

王稟靖康元年爲太原副總管六月賞城守之勞加建武軍節度使及城陷死之

岳飛字鵬舉相州湯陰人建炎初借補武經郎渡河戰于太行山累擒金將紹興六年太行山忠義社梁興等百餘人慕飛率衆來歸晉宣撫使七年命宣撫河東節制河北路梁興會太行忠義及兩河豪傑等期日興兵與宋軍會其所揭旗以岳字爲號父老百姓爭挽車牽牛載糗糧以饋義軍而秦檜亟下班師詔十一年罷爲

壽觀使歲暮檜手書小紙付獄斃之淳熙六年謚武穆
嘉定四年追封鄂王

金

張亨字彥通大興溇陰人登進士第章宗初爲河東南北
路提刑使兼勸農採訪使訪其利病條爲十三事以聞
上嘉納之亨在職每事存大體畧苛細故所至可稱

裴滿亨字仲通臨潢府人泰和末爲河東南北路按察使
卒於官上聞而惜之賙物甚厚亨歷州郡皆有政績云
烏古論仲溫蓋州按春猛安人登進士爲河東路提刑判
官貞祐初遷鎮西軍節度使元兵至城破不屈死諡忠
毅

完顏從坦宗室子自募義兵二千充宣差都提控貞祐

大原府志 卷三十一
年安撫山西軍民興定二年元兵至平陽提控郭用戰於城北被執不屈死癸丑城破從坦領十餘騎巷戰手殺數人知不能支乃自殺贈武昌軍節度使

元

姚天福字君祥絳州人至元十二年爲河東道提刑按察副使時河東民苦徭役天福劾執政失計奏罷其役

程思廉字介甫家東勝州成宗初除河東山西廉訪使請減太原餉諸王駝馬數民賴以甦

郭貫字安道保定人大德十一年爲河東廉訪使至大二年仁宗至五臺山貫進見仁宗問廉訪使滅里吉歹何以有善政左右對曰皆副使郭貫之教也因賜貫瑪瑙

數珠金織文幣

尉遲德誠字信甫絳州人至大四年爲河東山西道宣慰司同知擊奸吏寬稅歛上計京師擢工部尙書

王利用長安人延祐間由翰林出爲河東山西道按察副使文學政事交重於時

歸暘字彥溫汴梁人至正五年僉河東廉訪司事行部西京以法繩趙王府官屬之貪暴者王三遣使請不爲動屢讞疑獄盡得其情後轉僉淮東廉訪司事

察罕帖木兒潁州沈邱人幼篤學嘗應進士舉有時名平居慨然有當世之志至正十六年以平賊累官兵部尙書時曹濮賊分道踰太行焚上黨掠晉冀陷雲中鴈門代郡烽火數千里察罕先遣兵伏南山阻隘自勒重兵屯聞喜絳陽賊果走南山縱伏兵擊之賊皆棄輜重走

山谷河東悉定都魯之子曰孛羅因欲並據晉寧遂至
兵爭天子屢卜詔解和之終不聽後爲王士誠所刺計
聞追封潁川王諡忠襄以子擴廓拜太尉中書平章事
總父兵取王士誠之心以祭其父餘黨皆就誅

王思誠字致道兗州磁陽人進士第至正初僉河東山西
道肅政廉訪司事行部武鄉縣監縣來迂思誠私語吏
屬曰此必賊吏未幾果有訴於道側者問曰得無訴監
縣斂汝馬乎其人曰然監縣抵罪吏屬問思誠先知之
故曰衣敝衣乘駿馬非詐而何

明

曹良臣安豐人潁寇起聚鄉里築堡自固後歸太祖從大
軍取元都畧地至澤潞晉山西行省平章時元丞相也

速將萬騎營白河良臣以計却之追逐百餘里五年戰沒於阿魯渾河贈安國公諡忠壯

何真字邦佐東筦人少英偉好書劍元末據廣東爲行省左丞明洪武元年來附授山西右布政使尋封東筦伯卒

楊基字孟載先世蜀之嘉州人生於吳中家天平山赤城之下穎敏絕人九歲背誦六經著書十萬餘言洪武七年以兵部員外郎出爲山西按察副使進按察使被讒奪職

熊鼎字伯穎臨川人元末舉於鄉鄧愈薦之留幕府洪武時爲晉王府右傅復授晉王府叅軍八年改岐寧衛經歷西部榮兒只旣降復叛鼎責以大義罵賊被殺立祠

張孟兼浦江人與修元史劉基嘗爲太祖言今天下文章
宋濂第一其次卽臣基又次卽孟兼用爲山西僉事廉
勁疾惡糾摘奸猾吏民間張僉事行部凜然墮膽聲聞
於朝

徐賁字幼文其先蜀人居吳家城北望齊門外工詩善畫
山水洪武九年與顧璜同受命廉訪山西簡其橐惟紀
行數首授給事中官至河南左布政使

龍鐔字德剛江西萬載人洪武十三年貢爲國子生陞晉
府長史建文中靖難師起朝廷徵兵於晉鐔以大義力
主發兵靖難後詔械鐔至不屈死之

彭通字萬里南海人洪武中累官山西布政司叅政嘗奉
命巡東郡用事者遺以金辭不受及蒞叅政河東運司

匿羨餘廉得之寘于法有吳印者故五臺寺僧也以才辨受知爲陝西方面官家人橫肆偶以事干通通直其罪斥辱之條其事以聞尋以年老致仕

韓宜可字伯時浙江山陰人元至正中辟爲掾不就洪武初薦擢監察御史剛直敢諫特授山西右布政使卒之夜大星隕櫪馬皆驚嘶人謂宜可當之云

王彰鄭州人洪武間布政司左叅政廉直無私官吏咸服王敬先偃師人博通經史工文辭洪武間以賢良舉授山西布政司左叅議

宋文祥符人性資醇厚學行兼備洪武時以隱士薦送京師授山西按察司副使廉能稱著風紀肅然

宋禮永寧人洪武間按察司僉事持法嚴明人莫敢犯後

遷工部尚書

樊鎮考城人初授御史振揚風紀有能聲洪武間任山西副使擢山西叅政所至廉幹勤敏大得時譽

鄭辰字文樞浙江西安人登進士第繇御史超遷山西按察使糾治貪濁不少貸潞州盜起有司以叛聞詔發兵討捕辰方以事朝京師奏曰民苦徭役而已請無發兵上然之還則屏騶從親入山谷撫諭盜皆感泣復爲良民禮部侍郎蔚綬轉粟給山海軍辰統山西民輦任民勞多逋耗綬令卽山海貸償之辰曰山西民貧而悍急之恐生變不如緩之使自通有無用其言卒無逋者內艱歸軍民詣御史乞留服闋還舊任辰重義輕利與山西同僚杜僉事有遺言杜卒爲治喪資遣其妻子

徐永達字志道歸德人洪武丙子舉人宣德中以湖廣按察使改授山西劾治苛暴擒捕奸貪雖強禦不避威望大著嘗持節王國所與鞍馬金幣襲衣悉辭不受比卒不能具棺故所至能樹風節云

于謙字廷益錢塘人登進士第爲御史宣德中上知謙可大任手書謙名授吏部遂超遷兵部右侍郎巡撫河南山西年僅三十三謙徧歷諸州縣察時所急事所宜興革卽具草言之一年章數上遇水旱輒立奏六年疏言今河南山西積穀各數百萬計臣欲於每歲三月令府州縣申報缺食下戶隨分支給先菽秫次黍麥次稻俟秋成償官而免其老疾及貧不能償者府州縣例秩滿當遷卽預備糧儲未足不聽離任仍令風憲官以時稽

察詔可自是儲積充溢境內數千里民無水旱憂謙每
議事京師空行無所齎權要多憾之通政司李錫阿中
官王振指劾以久不遷怨望遂下法司三月山西河南
吏民伏闕上書請留謙者以千數周晉諸王亦言之乃
赦謙以大理少卿復任巡撫謙前後在任十九年兩丁
內外艱詔皆許歸治喪正統十三年以兵部左侍郎名
明年遂有土木之役晉兵部尚書功在社稷天順元年
正月棄市陰霾四合朝野冤之成化初復官萬歷中改
諡忠肅

蕭伯剛邠州人永樂末舉人歷任山西僉事能振揚風紀
致仕歸

蕭誠朝邑人太學生陞山西左叅政處心忠信措事寬平

人稱爲長者

蔡彬武邑人永樂中由太學生歷任山西左叅議有惠政及民

趙紳歷城人舉人官山西叅議以老疾致仕朝廷念其廉介賜半俸養老

周道朝邑人永樂間舉人山西僉事有惠政卒於官喪出民遮道哭奠三日不得行

王琦字文進浙江仁和人正統中任山西按察僉事提督學校士風丕變以母憂去

張鄴汶上人永樂間解元由教諭陞山西按察司經歷承檄執妖賊勦敵屢立奇功母卒廬於墓側詔旌其門累官鳳陽知府

張政廣德人洪熙間以御史巡按山西明年復命陞本省
按察使政暇以經學授士子士子多所拔擢

黃常祖字邦經世居閩之涵江登進士以部曹薦陞山西
布政使司左叅議并晉地瘠民貧值歲凶多流亡常祖
奏乞招徠聽免徭役三年悉復業平陽界上有盜聚千
人爲害常祖推誠諭之不旬日皆降附正統十年致仕
歸里

劉珏字廷侯長洲人宣德時以應天鄉薦授刑部主事遷
山西按察僉事提督屯田操履清白人不得以私干之
性孝友工詩致仕卒

朱鑑字用明晉江人舉鄉試宣德中用薦爲山西左叅政
居數年晉右布政司郟王監國就擢左副都御史巡撫

其地上言宜重將帥事權悉罷監軍中貴重懸賞格鼓
勸義旅上嘉納之時寇窺塞下鑑日夜爲守禦計修築
各州縣及沿邊城堡聚置騎甲計萬餘名募壯勇萬七
千人寇引去臻仕卒

朱冕沂州人榮之子也嗣武進伯宣德中以晉王濟熯新
廢命鎮山西正統十四年北征戰于陽和死之諡忠愨
白圭字宗玉南宮人正統七年進士除御史巡按山西辨
疑獄百餘部檄朔州課鈔益三之二圭疏爭復三十取
一之舊任至兵部尚書卒贈少傅諡恭敏

王來慈谿人宣德中以教職薦爲御史巡按北直隸時于
謙爲兵部侍郎舉以自代後爲山西叅政有惠政

左鼎字周器永新人正統七年進士巡按山西英宗北狩

悉心謀畫戰守時兵荒游臻請蠲太原諸府稅糧停大
同轉餉夫以蘇其困也先請和抗言不可引宋景德靖
康事爲鑒鼎善草章奏京師語曰左鼎手練綱口後爲
左僉都御史卒

王綱上高人進士第正統間爲山西右布政使行止端方
執法不撓自御史歷官布政所至有聲後致仕

鮑時安福人進士第正統間任右叅議政餘以春秋之學
淑人

楊璿字叔璣無錫人進士第爲山西右布政使定民差役
均平無弊後巡撫河南卒於官

石璞字仲玉臨漳人山西布政使剛直有治才刁民奸吏
胥畏後掌南京都察院事成化初致仕歸

倪敬字汝敬無錫人進士第景泰中巡按山西奏罷入粟補官令成將侵餉者悉按治豪猾斂手後復以直言諫典史遷督府都事卒

祝顥字維清江南長洲人正統間進士景泰中任山西布政使叅議專督糧儲時大寇之後倉府空竭饑民流散顥招亡撫存條法曲盡進階右叅政仍督糧儲以晉俗少文振以儒術廣選生徒躬親教授天順中汾州妖賊作亂就擒首謀止十六人顥以罪坐首事不欲多傷善類得旨如議顥行部封內往往駐車問民間利弊力爲興除過高山大川及古人祠墓登臨弔謁一時詩板流傳海內皆推大手居叅政七年上疏請歸卒於家

劉世忠字攄誠山東濮州人景泰時累官山西叅政癸卯

甲辰歲大饑民嘯聚垣曲山中千餘人剽掠鄉村公舉
騎入賊壘曉以禍福衆感泣棄兵器羅拜遂爲良民後
陞都御史巡撫延綏

葉盛字與中崑山進士景泰間任山西右叅政協贊獨石
等處軍務先是獨石諸城屢事修復未見安輯盛乃上
興革事宜八條次第行之又買牛種付戍卒不任戰者
屯田以給軍中諸費復立社學建義塚設爨鋪拊循有
方邊人歡洽陞吏部左侍郎卒諡文莊

王璠字廷瑞寧遠人景泰間進士性亢爽有局幹尤習吏
事累擢山西布政司左叅議分守冀北道冀北古雲中
地北部出沒不時戍卒餽餉恒虞不繼璠多方調畫邊
鎮荷以爲重

字延佐桐城人進士第任山西右布政使蒞官慎勤存心仁厚凡所設施務使民沾實惠前後志操始終一致致仕歸有宦游稿行世

李侃字希正東安人正統七年進士天順二年復設山西巡撫遷侃右僉都御史侃性剛方力振風紀貪墨者屏跡丁母喪歸軍民擁泣至不得行家居卒子德仁進士河東鹽運使

賈俊字廷杰東鹿人以鄉舉入國學天順中選授御史巡撫山西有聲累官工部尚書加太子少保致仕卒

邱陵字志高蘭陽人宣德四年舉鄉試第一任平鄉知縣以政績卓異擢山西左布政使致仕卒子輅山西布政司左叅政

李騫字邦傑華容人由鄉貢累官至山西右叅政爲人廉直敏慎嗜學工書所居輒爲人重致仕後石田茅屋而已足跡不履城市

馬文升字負圖鈞州人景泰二年進士授御史出按山西風裁甚著仕至吏部尙書卒贈太傅諡端肅

雷復字景暘湖廣寧遠人成化七年爲右副都御史巡撫山西繼李侃後端恪守法得軍民心累敗強寇時山西大禮而令預徵芻餉轉輸榆林復上奏蠲除仍發帑賑贍上從之發金三萬兩不足又請鬻鹽四十萬引竝令民入粟授散官皆報可卒於官

朱瑄號鈍菴華亭人總角能賦詩正統間進士以御史出巡景擢山西僉事屬吏有不法者聞風而去尤多平反

寃獄清軍伍明恕不苛無隱沒誣枉之弊才名益起凡分巡官缺瑄輒兼領其事一日至大同有中貴親幸者入境欲射獵爲樂瑄與語遂斂威而去邊人不至驚擾丁外艱服除復任山西後致仕卒

秦絃字世纓單縣人景泰初進士成化十三年爲右僉都御史巡撫山西奏鎮國將軍奇澗等罪奇澗父慶成王鍾鑑爲奏辯且誣絃上重違其意逮絃下法司治事皆無驗於是奪奇澗等三人爵王亦削祿三之一而改絃撫河南後仕至戶部尙書致仕卒贈少保謚襄毅

何喬新字廷秀江西廣昌人吏部尙書文淵子也景泰五年進士成化十六年爲右副都御史巡撫山西邊地軍民每出塞伐木捕獸喬新言此輩苟遇敵必輸情求生

大原府志 卷三十一
皆賊黨也宜毋聽闌出犯者罪守將詔可敵犯塞借叅
將支玉伏兵灰溝營擊斬甚衆歲饑奏免雜辦及戶口
鹽鈔十之四劾僉事尙敬劉源稽獄請勅天下斷獄官
淹半載以上者悉議罪上稱善亟從之名拜刑部侍郎
山西大饑命往賑活三十餘萬人還流冗十四萬戶仕
至刑部尙書致仕卒贈太子太保謚文肅

胡謐浙江會稽人登進士提督山西學政謐嗜學于書無
所不窺訓諸生以德行為重評文高下悉當後轉本省
叅政山右故無志謐始草創之

王盛字懋德韓城人成化進士爲人孝友廉介崇正闢邪
以給事中陞山西叅政暇日惟以教人爲事河東一時
名士出其門者甚多因目爲關西夫子所得俸祿盡散

族人親識而家無餘資

李芳利津人成化間進士以監察御史出按山西偃歲饑奏發內帑賑之歷官按察使發奸摘伏吏畏如神

敖山字靜之山東莘縣人成化間進士授翰林編修爲時推重出提督山西學校晚年尤精數學

楊一清巴陵人數歲能屬文應奇童舉至京得名見十八登進士成化間任山西提學僉事宏才碩望師範端嚴人才高下甄別不爽表節義禁浮華士人翕然宗之累官至大學士贈太保諡文襄

石玉藁城人成化間山西副使發奸摘伏人稱神明疑獄片言而決全活甚衆二子玠璠登進士遂致仕

張進祿清澗人登進士巡按山西榆次有巨俠怙惡搆黨

魚肉小民廉知之悉寘於法境內遂安

左鈺字廷珍阜城人舉於鄉累官都察院右僉都御史巡撫山西後成化二十二年復命巡撫山西兼都督雁門諸關通敏有才畧一時稱之致仕卒

顧佐字良弼臨淮人成化五年進士宏治中爲右僉都御史巡撫山西宗室第宅官爲繕費不貲請悉令自營治正統末權發太原平陽民戍邊後遂久不代奏令代遷累官戶部尙書乞歸卒贈太子太保

張敷華字公實安福人年七歲里社樹爲祟磨羣兒盡伐之舉天順八年進士宏治初爲右副都御史巡撫山西中道奔喪服闋還故官部內賦輸大同困于折價請太原以北利轉運者仍輸米民便之仕至左都御史致仕

卒贈太子少保諡簡肅

吳道寧字世安河內人登進士居官以慈愛爲本節民財力爲先宏治十一年陞山西按察司副使整飭雁門等三關兵備修築沿邊堡塞募軍充實武備一新邊人有賴後以疾歸

劉瑀字汝器蠡縣人登進士任山西右叅政值歲饑盜起瑀招徠賑貸民甚賴之

陳震字文靜慶陽人登進士爲御史風裁凜然陞山西按察副使務以德化及陞按察使憲度益修仕至兵部右侍郎致仕卒

李蕙字德馨當塗人進士累擢山西右布政使踰年轉左布政使公移出入吏多緣以爲姦蕙痛治之姦弊盡息

惠澤多及於民有畫像以奉之者後督南京糧儲卒於官

楊文卿鄞縣人登進士授山西提學僉事操履端嚴勸懲有道斥邪術毀淫祠申禁約建社學教化大行

王鴻儒字懋學南陽人登進士累遷山西僉事晉副使俱督學政居九年士風甚盛孝宗嘗語劉大夏曰藩臬中若王鴻儒可大用也後遷南京戶部尙書卒謚文莊

李景繁字邦泰儀封人成化中進士累官山西右叅議理儲景繁行塞上凡十年而餉運不闕擢四川叅政以疾乞致仕

藍章山東卽墨人宏治中以監察御史巡按山西風裁自持彈劾不避權貴轉左僉都御史忤瑾左遷

姜洪字希範廣德人登進士爲御史累彈權貴正德二年遷山西右布政使劉瑾索賀印錢不應矯詔罷歸瑾誅復起七年以右副都御史巡撫山西未滿歲卒洪歷官四十載居無垣墻

徐節字時中貴州衛人登進士巡撫山西廉謹守法無一事擾民會逆瑾擅政見忤削秩罷歸瑾誅詔復職致仕曹鳳字鳴岐號西野新蔡人登進士任山西左叅政終都察院右副都御史巡撫延綏性孝友清介不御統綺不問貨殖遺愛在民始終不屈身於權瑾士林重之

李鉞字虔甫祥符人登進士巡撫山西修理關隘敗寇于岢嵐加棒一級又討平內寇武延章等仕至兵部尙書卒贈太子少保諡恭簡

趙佑字汝翼雙流人登進士爲御史以劾中官劉瑾勒罷
後起山西僉事卒

徐暹歷城人登進士任山西副使平巨盜混天王民頌之
卒於官

孫修字用吉號廣原邯鄲人登進士任山西按察使公廉
有威上下憚之歷官南京操江致仕歸

尙衡字一中同州人宏治間進士任山西叅議駐平陽平
陽故藩邸多馮藉以攘民衡力禁之盜首常聚西山設
計擒殺散其餘黨移守冀寧流賊寇河東太原甚急衡
檄指揮賈彪設伏盤馱坂下又檄官軍追賊賊自壺關
遁去後左遷漢陽卒

馬應祥字公順山東高苑人登進士命山西督屯時屯田

子粒多負欠併徵實難應祥謀諸撫按許他物相準卽以給士卒甫三月完十六七撫按獎其賢尋擢按察副使頻上疏乞休爲歸畊園觴咏自娛

張敏字時勉嘉興海鹽人舉於鄉累陞山西布政司右叅政雄武有謀畧遇事敢爲摘人隱伏多曲中致仕歸楊澄射洪人登進士巡撫山西約已厚士繕邊修具富儲選將勤蒐練廣間謀民賴以寧

陳鳳梧江西泰和人正德間以進士任山西提學副使高才博學持身廉潔教士以德行爲先冠婚喪祭悉令遵用朱子家禮所頒條約數十款皆身心切務論文復極詳慎每引諸生至堂下教以明體達用之學後官至兵部尙書

王崇文字叔武曹縣人珣第三子登進士武宗時擢山西
叅政壺關盜起將發兵勦之崇文論以禍福多所解散
擒其首惡餘黨悉平後巡撫保定引疾歸

黃珂遂寧人進士正德間山西按察使具經緯才有雅操
執法公平吏民懷服累官工部尚書

馬卿林縣人進士正德間山西提學副使端嚴有體閱士
校文雖寸長必錄褒獎行義遠近向慕之歷官都御史
王尙綱邠縣人進士正德間叅政恤民均惠善政纍纍未
幾以親老疏歸後起復山西叅政陞浙江右布政使德
行文章與李何齊名

劉澤濟寧人進士正德間分守冀寧道時朝廷有事西北
六軍扈從供億不貲澤以方面重臣來總其事調度有

方且親按擾民者以警衆又償牛羊價值檄旁郡協濟
居者以寧逃者以歸旋車之日老幼焚香稽首不忍舍
顧璘字華玉上元人宏治九年進士歷山西巡撫有聲後
遷南京刑部尙書卒璘少負才名與何李相上下

宋景字以賢奉新人登進士累官山西副使民饑爲盜殺
守禦指揮景樹幟令被脅者赴之賊咸歸命乃擒斬其
魁四遷山西左布政使仕至左都御史卒贈吏部尙書
諡莊靖

陸深字子淵上海人登進士任山西提舉副使有聲仕至
詹事卒諡文裕

張文魁字元甫號子川河南蘭陽人登進士累陞山西按
察司僉事巡冀北道勘劾權要無所徇嘗修沿邊險阻

遇伏於橋頭堡以護兵直前迫之皆遁去胡中丞銳薦其才陞布政司左叅議復守冀北累官都御史致仕卒應良字原忠仙居人登進士受學王守仁嘉靖初爭大禮廷杖出爲山東副使謝病歸卒

江潮字天信貴溪人宏治己未進士以文武才被薦拜都察院右副都御史巡撫山西兼督三關軍務在任二年寇不敢近太原人李福達以妖書惑衆聚黨數千人潮捕之急遂詭張寅名入京夤緣武定侯郭勛因匿勛家勛貽書山西部使者爲關說潮捕得其書抗疏陳福達罪狀併劾勛怙勢藏逆疏三上不報因罷官歸隆慶初贈兵部左侍郎

馬錄字君卿信陽州人登進士爲御史嘉靖五年出按山

西而妖賊李福達獄起福達惇人初以彌勒教誘愚民
邵進錄等爲亂事覺進錄伏誅福達得免更名姓曰張
寅挾重資往來徐溝間輸粟得太原指揮使子大仁大
義太禮皆冒京師匠籍用黃白術干武定侯郭勛其仇
薛良訟於錄按問得實勛爲移書祈免錄不從偕巡撫
江潮具獄以聞且劾勛庇奸亂法勛累自訴以議禮觸
衆怒爲言上心動張璫桂萼復合謀騰蜚語謂諸臣交
結借端陷勛上深入其言命取福達等至京下三法司
訊皆無異詞上怒甚命璫萼方獻夫分署三法司事盡
下前問官於獄并逮問錄萼等遂肆榜掠錄不勝刑自
誣故入人罪乃戍廣西南丹衛遇赦不宥後四川大盜
蔡伯貫就擒自言學妖術于山西李同所司檄山西捕

同下獄同供爲李午之孫大禮之子世習白蓮教惑衆倡亂與大獄錄姓名無異同竟伏誅穆宗初御史龐尙鵬上言郭勛世受國恩乃黨巨盜陷朝紳乞追奪勛等官爵優卹馬錄諸人以作忠良之氣繇是福達獄始明戴鱉字時重鄞人登進士任山西按察使振飭憲典官僚憚之有闔豎殺人匿宗室家吏不敢問鱉卽收捕付獄聞者悚息有巨商持宰相書來告逋欠者輒焚書杖而遣之曰爲朝廷監司寧爲賈豎責券耶知縣某受賕殺人巡按御史知其與權貴有連釋之鱉爲正法乃已仕至四川巡撫都御史坐謗落職歸

楊最字殿之射洪人登進士授工部主事督漕山西憫其民貧不俟奏報輒返尙書李鏞劾之有詔復往最乃與

巡按御史牛天麟極陳歲災民困狀請緩其征從之世宗悅方士段朝用言欲令太子監國最極諫杖死後贈右副都御史諡忠節

曹蘭咸寧人登進士歷山西布政使時大同叛變蘭毅然獨往履險決策賊不敢犯

傅鑰字希準遼東廣寧人登進士累陞山西按察使用法平恕不事操切而專持大體富民某坐殺人當死後以貨免鑰收鞫之寘於法主簿某知縣某皆良吏以忤當道意爲奸人所構事下按察司竟白之終河南巡撫

張文奎字應光陝西洛川人登進士性沉毅慈仁累官山西按察使司督理屯田時叅將謀違例占種人不敢詰文奎接劾不貸屯政就理以賢能薦後晉山西左布政

使廉節愈厲華加耗裁公費晉省以寧

潘鑑字希古婺源人登進士歷陞山西按察使性坦易不爲危言激論而耿介壁立不可干以私終兵部尚書卒贈太子太保諡忠襄

暢華字子實隴西人進士歷陞山西按察司僉事值岢嵐寇發撫按以華往不旬日渠魁悉殄脅從盡釋又以河東累值凶荒請勅專以華分巡河東弭盜安民時論偉焉年未六十乞休

孫繼魯字道甫雲南右衛人登進士爲山西叅政數繩宗藩暨遷按察使宗藩百餘人擁馬發其裝見敝衣外無長物乃載酒謝過後又巡撫山西始終以清節聞卒以非罪死晉人咸爲痛惜宗藩有上書訟其寃者卽前奪

視其裝者也隆慶初贈兵部左侍郎諡清愍

高叔嗣字子業祥符人登進士由部郎出爲山西左叅政
斷疑獄十二事人稱爲神叔嗣工詩蔡汝楠推爲有明
第一

王儀字克敬文安人登進士由知縣歷陞山西布政司叅
政守冀寧寇突清源城下儀令洞開諸門寇望之疑有
伏宵遁乃檄部中無城者築無糧者蓄無兵衛者選練
於是榆次平定之間皆有城寇戒不敢犯後至陝西副
使罷歸卒

靳學會濟寧人爲山西副使治績有聞

胡松字汝茂滁州人嘉靖八年進士累官山西提學副使
三十年秋上邊務八事條析利害咸切邊計上嘉其忠

大原府志 卷三十一
葛守禮字與立德平人登進士爲儀制郎中以爭郡王繼
封不受賂遺上繇是知其廉遷山西按察使後仕至左
都御史歸卒贈太子太保諡端肅

翟鵬字志南撫寧衛人正德戊辰進士素秉忠誠兼通將
畧由部曹累陞巡撫辛丑詔整飭直隸山西河南等處
軍務寇犯石州甚急鵬首挫其鋒斬獲無算地方以寧
陞兵部右侍郎兼左僉都御史總督宣大偏保等處軍
務回籍後寇復深入詔起仍前總督山東河南并聽節
制時太同邊墻久蕩爲平地寇入無阻鵬建議挑修壕
墻三百九十餘里添設守備得地一萬四千九百餘頃
省費數十萬累敗強敵又設策生擒王三奪獲器馬無

算人咸謂宣大數十年來僅有此捷忽下詔逮繫老稚無不泣下沾衣鵬竟感疾而終

楊守謙字允亨志學子登進士練習兵計巡撫山西興舉偏頭老營堡營田薦副使張鎬爲提調營田大興穀價減十五以山西修邊功加俸一級賜金幣有加後以勤王獲罪邊陲吏士胥爲流涕隆慶初贈兵部尙書諡恪愍

桑喬字子木江都人嘉靖十一年進士十四年爲御史出按山西所部頻遭寇躡奏請盡蠲徭賦厚恤死者家遂劾巡撫樊繼祖總兵魯綱等後又劾嚴嵩戍卒

吳嶽字汝喬汶上人嘉靖十一年進士累官山西副使又爲山西右布政使並以清靜得民仕至南京兵部尙書

卒贈太子太保諡介肅

童漢臣錢塘人嘉靖中爲御史二十年寇大入宣大總督樊繼祖等掩敗三以捷聞漢臣劾之繼祖等得罪出按山西時寇薄太原督諸將擊却之

蘇祐字允吉號舜澤濮人嘉靖丙戌進士性和易可親而耿介有節按山西監臨省試以得人稱錄大辟減死五十餘人擢山西參政分理雁門三關進右副都御史巡撫山西協守及營田奏功晉秩一等以兵部侍郎總督宣大山西軍務訓練精勤仕至兵部尙書致仕歸

許論靈寶人正德丙戌進士優于文而以用武顯在禮部嘗進九邊圖論又上備邊十二事上嘉之庚戌巡撫山西力却互市厚戍嚴關章十上無不剴切乃設亭障謹

烽火列拒馬佃營田部署周詳屹然足當山河之固累以戰功進兵部尙書總督如故復召入爲尙書論與世不合起而復黜者再卒以謫罷年七十二自理喪具端坐而終穆廟時子倓詣闕上書詔復故秩諡恭襄

周于爲山西指揮使禦寇死獲贈卹

江曉浙江仁和人進士嘉靖間山西右布政爲政持大體端方自居而與人以和終工部侍郎贈尙書

王喬年高密人進士嘉靖間分巡冀寧道時值荒旱土賊竊發以定襄段木山爲巢穴喬年設計擒之境內以安萬恭字肅卿南昌人嘉靖進士請劇邊自效命以兵部右侍郎巡撫山西却龍鬚墩寇又拒退寇于朔州川老高墓事聞賫銀幣又築濱河墻四十里教人以耕及用水

車法民大利之浹歲以艱歸後總理河道卒恭強毅敏
達一時稱才臣

連鑛字伯金永年人進士第以御史按山西議類解額辦
錢糧而三晉民力少蘇時秋警方殷兼鄉試重務鑛晝
夜勤理疏五上皆切中機宜科目亦稱得人累陞右副
都御史總理河漕以疾歸

郭斗雲南人嘉靖間以進士任山西驛傳道副使清理宿
弊立招商法使自供役遠近稱便敵騎入寇躬自登陴
守禦遇旱請于兩臺人給以粟晉人祀之三功祠中

陳瑞福建長樂人嘉靖間進士任山西督學道以興起斯
文爲任敵人寇時撫軍以防秋駐寧武藩臬以齋捧相
繼出疆瑞與驛傳道郭斗居守敵計以南關財貨畢集

而卑薄易破欲并力攻瑞分守南關出庫中兵器授士卒發金錢懸賞格舉炮火揚軍聲敵不敢前既退更爲修築使高厚與內城等今祀三功祠中

閔煦直隸任邱人嘉靖間進士任山西提學僉事先器識後文藝以修明教化爲務嘗取晉名宦鄉賢汰僞存真謂淑慝辨而後鑒戒昭歷任山西按察布政巡撫胥爲晉人愛戴云

周斯盛寧州人嘉靖間以進士任山西提學副使築河汾書院集士肄業文教大興病者醫之貧者賑之又纂輯通志表揚德行離任後諸生立祠祀之

楊宗器歸安人嘉靖辛丑進士累擢山西右布政使進右僉都御史提督雁門諸關兵務先時三晉罹兵荒至則

力圖安攘撫綏兵民節用儲餉嚴城勵兵關務以飭歲復大稔尋命督儲南都以疾卒

陳講遂寧人進士嘉靖間山西提學副使寬而有制課業有程多所造就歷官副都御史巡撫山西增築城堡邊境賴之

吳瀚字受夫洛陽人進士嘉靖間任山西按察使訊決精明獄無淹滯陞布政使是歲太原有邊警城素無備瀚誓衆分部固守躬督糧出犒師已而援兵四集士獲宿飽衆賴以安又議築關城以固保障晉人德之尋陞右副都御史巡撫畿甸兼督三關後以事忤時回籍

劉大謨字遠夫儀封人正德間進士會三晉大饑以才望拜右僉都御史巡撫山西提督雁門軍務上疏請出內

帑溥賑從之遣官齎銀五萬入晉陽時方旱大饑巡歷所至問民疾苦兼禱請旋復兩民大悅後巡撫四川卒於官

周滿字謙之廣漢人嘉靖壬辰進士奉命清保節宣大山西五鎮邊儲上疏言山西等省民兵之利弊悉用其言陞山西叅政選練日勤寇不敢度關轉山西左布政使終右副都御史著作甚富以乞休卒

高翀字允升安陸人嘉靖丙戌進士任山西叅政山西內外儲寄在叅省翀緩急有序治黃冊老吏不致弄法終右副都御史卒於家著有奏疏詩文諸稿

趙時春號浚谷少舉進士世宗時以徐階薦名爲兵部職方主事累遷巡撫山西都御史提督雁門諸關督兵禦

寇率以身先斥貪墨省征徭抑求請絕饋遺宗藩貴宦相戒莫敢犯法以謗歸卒于家

李僑字子高山東人進士第任山西左布政使山西三面距寇民無寧居僑保釐三載流亡漸歸邊境賴之竟以耿介不悅于當路投紋歸

王獻字惟臣咸陽人爲御史有論釋大禮諸放臣及論罷南都添設鎮守二疏人多稱之其技山西也時值歲饑且罹寇患下車卽請帑施賑民藉以生修武備振士風飭官常裕錢穀諸所設施軍民悅服至決晉藩襲封之疑以杜爭端尤人所推重後罷歸

曾銑字子重江都人自爲諸生以才自豪嘉靖八年進士巡撫山西經歲寇不犯邊晉兵部侍郎巡撫如故二十

五年夏晉總督陝西三邊軍務議復奪爲嚴嵩搆陷隆慶初贈兵部尙書諡襄愍

胡賓字汝觀光州人嘉靖乙未進士由太僕寺擢山西僉事會當防秋急詣繁峙激厲將士督修城堡嚴守備壬子聞母喪卽日奔歸後陞山西副使未至任疾卒

程紳字伯書號東溟樂安人性孝友嘉靖戊戌進士任山西按察司副使奉勅總理紫荆等關兵備日夜營戰守具寢食俱廢乙卯疾卒於官

趙祖元字宗仁婺人嘉靖甲辰進士累陞山西按察司僉事丙辰地震河東蒲州境覆壓過半盜乘之蝟起抄劫晝行祖元設方畧解散其黨而悉籍其金錢之無主者數十萬官貯之且新其城塹境以無事陞山西兵備副

使以憂歸

周宣莆田人進士嘉靖間山西提學副使有學行能以身
教士類咸稱得師

閔楷任邱人進士嘉靖間爲山西左布政使政尙廉平治
持體要雅稱旬宣之任官至侍郎

唐龍蘭谿人進士嘉靖間由陝西提學副使陞山西按察
使寬而栗威而不猛延見吏民咨諏疾苦黎庶歡洽仕
至吏部尙書贈少師諡文襄

王汝孝東平人進士嘉靖間山西提學副使教人敦行尙
實刊諸禮輯覽士知遵守闋喪卽日就道時雨雪泥濘
中諸生泣送不忍捨

楊惟聰直隸同安人進士嘉靖間山西右布政使持已嚴

毅悉民疾苦路見貧寒時爲周給仍檄有司各加存恤
惟於強宗貪吏不稍寬假人咸德之

陳洪濛字元卿臨川人以進士授主事累陞山西左叅政
泣冀南擒寇偵者一人又捕白蓮教諸賊特賜帑金仕
至都察院右副都御史乞歸四壁蕭然著有五經輯畧
性理纂要諸子粹言等書

宋淳開化人進士嘉靖間山西叅政其先守太平廉正撫
字剖決如流有宋一刻之號及叅大政存大體不以苛
察爲明仕至南贛巡撫致仕歸

楊巍字伯謙海豐人嘉靖二十六年進士隆慶初巡撫山
西所部驛遞銀歲徵五十四萬巍請減四之一修築沿
邊城堡千餘里檄散大盜李九經黨乞養母去後爲吏

部尙書歸卒贈少保

栗祁字子登夏津人嘉靖壬戌進士擢山西按察副使因備兵懷隆去郡父老泣送者數千人後拜山西叅政兩臺交薦大臣閱邊還報稱可大用遂以祁開府北邊爲人豐頤重厚舉止雍容美文詞平恕不苛馭下取寬簡而持已獨嚴所至有廉名以小疾遂不起

秦可大咸寧人進士歷山西叅議隆慶二年擢本省副使五年尋陞山西行太僕卿兵備寧武所至皆有政績

趙孔昭邳臺人進士隆慶間巡撫山西持大體不責苛細巡邊往復送迓止於臺前一揖諸司道府縣贖錢責令掛號分外不博一錢至厄塞險平城障修廢儲糶虛實士馬肥瘠徧歷三關歷所不周

宋纁字伯敬商邱人嘉靖三十八年進士隆慶初巡按山西俺答陷石州將士捕七十七人當斬纁訊得其誣釋者殆半靜樂民李良雨化爲女纁言此陽衰陰盛之象宜進君子退小人以挽氣運上嘉納之萬歷中爲戶部尙書嘗以山西連歲凶荒賴社倉獲濟請推行之天下上稱善仕至吏部尙書卒諡莊敏

王世貞字元美太倉人生有異稟書過目終身弗忘嘉靖二十六年進士隆慶中晉山西按察使有廉能聲母憂歸萬歷中仕至南京刑部尙書與李攀龍狎主齊盟攀龍卒獨操文柄二十餘年才最高地望最顯其續五子則陽曲王道行爲首云

劉奮庸洛陽人嘉靖三十八年進士穆宗初以裕邸舊恩

擢爲尚寶卿後因疏譏大學士高拱被謫神宗卽位擢
山西提學僉事秉義甚高量復宏遠視諸生如子弟晉
寺人如辟疆園者數處雖掃徑延之不往也其耿介如
此

薛亨字道行韓城人隆慶間進士擢山西提學僉事先德
行而後文藝以齋膳之羨置學田周士不給者遷副楚
憲過家以其祿爲宗人輸租置義田義學義塚又遷河
南按察使爲忌者所議坐罷

宋應昌會稽人嘉靖乙丑進士初授絳州歷陞山西副使
精心救荒禱雨用春秋繁露法有奇應龍見于甕鱗角
皆具其他編審義倉鄉約保甲上下安之終工部右侍

郎乞歸

李采非字君采河間人嘉靖乙丑進士由行人歷陞山西行太僕寺卿累晉右副都御史巡撫山西在晉久於閭閻疾苦長吏賢不肖邊關隘塞敵情向背如燭照數計故諸措注無弗當機宜協輿情者未幾罷歸

侯於趙字宗度嘉靖乙丑進士巡撫山西時以順義王俺答物故部落內關於趙慮有意外多方宣諭陰爲練兵儲糧之計邊方賴以無虞以母憂去家居十四年而卒李國士字汝志亳人由進士任山西左布政使藩祿邊餉積弊一清直指惡其抗直以老聞部方擬調而國士拂衣歸絕口不及世事

郭子章泰和人進士萬歷初山西按察使甄別廉貪辨明冤抑尤留意風教禁侈靡汰浮食抑強宗懲橫暴悍卒

驕弁皆祇畏歛跡又手著聖門人物志十二卷頒布諸生以示觀摩仕至兵部尚書

沈子木字汝楠歸安人嘉靖己未進士萬歷中陞山西布政使晉中大饑仿鄭俠繪流民圖奏上得捐帑金十萬爲賑治粥以飼餓者全活甚衆晉右副都御史巡撫山西在晉三年抑豪猾敦節儉下吏肅然其飭邊備則修障殖穀明賞申約復屯政通鹽利清尺籍作士氣除戎器事事覈實制府上其功賜金綺者三人爲兵部侍郎終南京右都御史

王象坤字子厚山東新城人嘉靖四十四年進士歷官山西左布政使有清操都御史溫純請顯陟象坤以風天

下

孫維城東郡邱縣人隆慶辛未進士以治行第一陞山西按察使寇小酋安兔恃驍從挾市龍門請以五千鐵騎待命關下維城知其虛實禁止之乃毋敢挾市幕府上其功晉右布政使移守宣府將吏悅服陞僉都御史開府榆林以疾卒於軍

呂坤字叔簡寧陵人萬曆甲戌進士任山西巡撫正己率屬自藩臬及承差吏胥皆有條約一切饋遺盡杜絕之尤憐恤鰥寡嚴飭邊防迄後遵成法不廢卒贈刑部尚書

李維楨字本寧湖廣京山人進士陞山西按察使明斷如神不事苛刻每以弼教明刑爲心敦請耆儒纂修山西通志親加考核當時稱爲信書仕終南京禮部尚書與

中原七才子先後齊名著大秘山人集行世

魏允貞字懋忠南樂人萬歷五年進士以右僉都御史巡

撫山西

素剛果清操絕俗以所部地瘠民貧力裁

幕府歲供及州縣冗費以其銀數萬繕亭障建烽堠置
器市馬易粟又奏免平陽歲額站銀八萬以所省郵傳
羨銀補之雁門平定軍以逋屯糧竄徙奏除其租招令
復業苛嵐互市省撫賞銀六萬汾州有兩郡王宗人與
軍民雜處知州秩卑不能制奏改爲府時以欵市弛邊
政獨勤視要害築邊牆萬有餘丈政聲大著上命中官
張忠採礦山西抗疏極諫不報會忠杖死太平典史武
三傑中官孫朝逼殺建雄驛丞李逢春又抗疏暴其罪
朝怒劾允貞抗命溫撓軍民數千人恐允貞去相率詣

闕愬寬兩京言官亦連章論救乃兩置之明年忠以夏縣知縣袁應春抗禮劾貶之允貞請留應春不報因上疏乞侍養二十上始聽歸士民爲立祠後卽家晉兵部右侍郎尋卒天啟初追諡介肅

吳仁度字繼叔金谿人悌之子也萬歷十七年進士累遷右僉都御史巡撫山西砥厲廉隅務慈愛與魏允貞齊名仕至工部左侍郎致仕卒

周繼昌無錫人萬歷間以進士督學山西風儀超朗植性剛明閱文高下悉當遇諸生訓誨調濟有如子弟至有勿檢立繩之法晉藩欲以威命凌一生力持護免轉楚叅議不赴歸

王三才蕭山人進士萬歷間山西督學副使文名擅海內

居心廉介以空缺銀兩置儒學常平倉以濟寒士又創建太原平陽考場歲省千金陞本省叅政

張夢鯉萊陽人萬歷間糧儲道督通省田糧派有額徵如期革櫃頭爲官收之例晉民稱便後任右轄董理鑄錢其利大行纂修賦役冊書悉出手裁永爲經制

趙文炳任邱人進士萬歷間巡撫山西摧強抑暴豪惡屏跡官僚望之凜然時有鐵面之稱行日不持一錢捐贖金萬餘散郡邑立養廉倉收息以賑寒士

呂三才臨朐人進士萬歷間山西督學道閱文知人心術及富貴貧賤功名遲速歷歷不爽戊午科榜中式皆試文評語有甲字者士子稱爲神明陞本省叅政

朱爵開州人爲吏科給事中諫三王並封劾輔臣趙志臯

張位私同年羅萬化爲吏部坐謫山西按察司知事卒
天啟中贈太僕寺少卿

翟鳳翀字凌元益都人萬歷三十二年進士爲御史抗疏
極論中官呂貴等罪謫山西按察司經歷與給事中郭
尙賓號二諫後巡撫天津卒贈兵部尙書

鄭國昌邠州人萬歷三十五年進士歷官山西叅政崇禎
元年遷山西右布政使三年正月殉城一門盡死贈太
常卿

麻僖慶陽人萬歷三十五年進士爲兵科給事中四十五
年京察以僖倚附東林謫山西按察知事後仕至太常
卿賊陷慶陽不屈死

楊松河南衛人爲御史劾尙膳少監黃雄詐稱駕帖鑄三

級給事御史交章救不納謫山西布政使照磨萬歷中終山西副使

李徵寧任邱人萬歷三十八年進士歷官山西按察使罷歸崇禎九年以殉難贈卹

白希繡延安人萬歷進士陞山西巡撫都御史墨吏望風解組

蔡復一敬夫同安人博學善屬文萬歷二十三年進士光宗時爲山西右布政使清介自持天啟中卒橐無遺資謚清憲

王豫立字定父涇陽人萬歷間進士爲山西按察使正己率屬墨吏猾胥皆爲斂跡時璫燄方熾上疏請休熹宗執疏疊念曰廉官廉官不准辭而豫立再疏請休益

堅臥不起居鄉十年調急不倦鄉人德之

來復字伯陽三原人進士天啟初分巡河東道歷陞山西布政使所至治行卓越復穎悟過人文詞琴奕書繪皆臻其妙卽醫卜星占無所不精至不拜魏祠人尤稱之鄒嘉生武進人萬歷間進士重氣節有操守不肯附人崇禎初任山西按察使釋繫囚辨冤抑不事苛察光明正大

大人不敢欺至革淫祠禁侈汰尤有關於世云

陸文衡吳江人萬歷乙未進士由工部主事出守福州府崇禎初累陞山西布政使張獻忠之亂督率官民守城拒賊勤勞茂著旋丁母憂遂絕意仕進

祝徽臨川人進士崇禎初任山西巡按懲貪興廉法紀振

肅

蘭剛中字坦生陵縣人崇禎四年進士繇南京給事中遷山西副使甫蒞任流賊入城被執說之降大罵曰豈有蘭坦生屈膝求活者乎賊殺之首旣墮復躍起丈餘賊皆辟易

曹文詔大同人勇毅有智畧崇禎中以擊賊功陞延綏鎮總兵時流賊見陝兵盛多盡入山西勅令文詔入晉協勦於是令陝西山西諸將並受節制文詔連敗賊于太谷榆社等處賊幾盡餘黨乃流入河北文詔卽移師討之旋被御史劉令譽劾罷發邊衛充軍崇禎八年起補總兵官戰歿于陝西之湫頭鎮贈太子太保左都督艾萬年米脂人由武生從軍積功至神木叅將崇禎五年山西告警從文詔東征與李卑一月奏五捷擢山西副

總兵又捕殺王豹五與其黨領兵王生擒翻山動姬開
鎖掌世王給事中張第元請錄萬年功萬年適以疾歸
後戰歿于寧州之襄樂

虎大威榆林人勇敢嫻將畧累官山西叅將屢敗巨賊晉
副總兵復以扼賊功加署都督僉事十年春代王忠爲
山西總兵官疏言諸將討賊零級不可取生口不可貪
封域不可限上採納之十一年兵部甄別以稱職增秩
十四年中砲死於汝寧

猛如虎塞外人家榆林積功至遊擊崇禎六年從曹文詔
擊山西劇賊累有功如虎驍果善戰與虎大威齊名許
鼎臣戴君恩等相繼爲巡撫並委任之加副總兵又加
署都督僉事及援勦河南勞績甚著十四年南陽陷衝

女原府志
卷三十二
擊賊搃死

袁繼咸字季通宜春人天啟五年進士崇禎七年春爲山西提學僉事子身赴任校閱公明聲望大著巡撫薦其廉能請加優擢而巡按御史張孫振以請屬不行銜之特疏誣繼咸賊私事上怒逮繼咸諸生聞繼咸逮羣隨至都伏闕訴冤繼咸得復官孫振坐謫咸天下快之後總督江西湖廣應天安慶軍務駐九江殉職

宋統殷卽墨人崇禎間以進士任山西巡撫時流寇蜂起統殷親督師擊于長子勝之又以師會總督張宗衡大破賊于桑子鎮未幾解任去

田時震富平人天啟二年進士崇禎中忤當事出爲山西右叅政罷歸十六年流賊陷富平不屈死

朱裳未詳何地人少勵清節學於京師無僕從自炊汲讀書不輟登進士巡按山西有風采常茹菘連旬人稱爲長齋御史

都任字宏若祥符人萬歷四十一年進士崇禎中爲山西按察使性剛毅多忤物月朔諸僚約同朝晉王任曰會典朔望朝王惟都布二司不及按察按察得糾舉非法柰何與守土者同朝執不行巡按御史張孫振誣劾提學僉事袁繼咸任數慰問繼咸贖其行孫振中以大計貶職歸後飭榆林兵備十六年殉城

許鼎臣武進人崇禎六年以進士任山西巡撫鼓勵將士誓掃寇氛適沁水張道濬設伏三纏凹中生擒賊首滿天星等鼎臣爲獻俘闕下並奏功第一爲當時勸已而

部議鼎臣駐汾州統岢嵐寧武諸軍凡汾太遼沁三十
八州縣有盜倣卽以責之

黃世清字澄海滕縣人崇禎七年進士累官山西冀寧道
僉事遷商雒道十六年十月殉城贈光祿卿

蔡懋德字維立崑山人萬歷四十七年進士崇禎十四年
十二月爲右僉都御史巡撫山西十五年大盜王冕等
爲亂討平之總兵徐定國援河南潰歸懋德定其亂十
月統兵入衛畿輔而賊已陷河南將犯平陽境急馳河
上禦之數月至十六年冬賊入潼關陝西盡陷自蒲州
北抵保德二千餘里悉與賊隣恃黃河爲限窮冬冰合
賊騎得長驅懋德連章告急請禁旅及保定宣府大同
兵馳赴河干合拒然無兵可援宣大總督王繼謨奉命

防河亦不至懋德以疲卒三千當數十萬強寇日奔走平陽汾州間猶屢挫之十二月岢嵐保德俱告警太原洵洵晉王手書趣懋德還懋德不得已分兵守二郡以十八日去平陽越五日李自成至知府張麟然迎降平陽遂陷十七年正月巡按御史汪宗友劾懋德不待冰泮遽還太原詔奪官候勘以郭景昌代之時屬城盡陷懋德乃與布政司使趙建極諸監司毛文炳蘭剛中畢拱辰太原知府孫康周署陽曲縣事長史范志泰等大集城中人誓以死守懋德哭衆皆哭聲震原野罷官命適至或請出城候代懋德不可曰吾已辦一死矣景昌卽至吾亦與俱死是月晦游騎抵近郊自成知懋德賢遣使招語曰撫軍若降吾且大用懋德憤立火其檄斬

使人頭懸城上二月五日賊衆悉薄城遣部將牛勇朱孔訓王永魁出戰俱敗歿六日自成具偽鹵簿督衆力攻城上發砲擊之賊多死七日晝晦大風拔木飄瓦終夜不息守者皆仆懋德知其不能支預草遺表而部將張雄守新南門與賊通緹城出降語其黨曰城東南角樓貯火器火藥我下卽焚樓樓焚守者悉走賊乘勢登城懋德北向再拜出遺表授贊畫知縣賈士昌命其間道奏聞拔刀自剄爲麾下所奪中軍應時盛請下城巷戰遂扶上馬時盛持矛突殺數十人至炭市口賊騎充斥時盛呼曰且擁公出西門懋德遽下馬曰我當死封疆汝輩可自去衆復擁懋德上馬至水西門懋德叱曰汝輩欲陷我不忠耶復下馬據地坐時盛已出城還

顧不見復斫門入曰請與公俱死遂偕至三立祠懋德就縊未絕時盛釋甲加諸肩乃絕時盛再拜訖卽去弓弦自勒死

趙建極河南永寧人萬歷四十七年進士賊掠永寧五子皆死累遷山西布政使流賊入城危坐公堂賊擁至晉王府欲授以官叱曰我天朝方伯乃仕賊耶李自成令曳出斬之下階連呼萬歲曰臣失守封疆死有餘罪自成以爲呼已也曳還問曰旣呼萬歲何不受官建極厲聲曰我呼當朝主上寧呼賊耶大罵自成立殺之趙氏一門竟絕

陳純德字靜生零陵人舉崇禎十三年進士年已六十矣莊烈帝召進士咨時事立擢御史十四年巡撫山西威

上知盡心職業七月部內嚴霜八月大雪民多凍餒疏請恤因極承抽練之弊後督畿輔學政十七年三月二十一日殉職

畢拱辰字星伯掖縣人舉進士由淮徐兵備僉事移冀寧被賊執賊適得新刀拱辰睨之問何睨曰欲得此斫頭耳賊遂取斬之

毛文炳字夢石鄭州人由進士歷知壽陽榆次縣興文教正風俗擢山西兵備副使爲流賊所執誘以官不從抗罵數日被殺妻趙氏妾李氏俱投井死子兆夢甫數歲被掠去士民以忠臣子贖而歸之

周遇吉錦州衛人少有勇力善射崇禎中累功至京營前鋒營副將加太子少保左都督十五年冬任山西總兵

至則汰老弱繕甲仗練勇敢一軍特精十六年十二月
李自成陷全陝將犯山西遇吉以沿河千餘里賊處處
可渡分兵扼其上流以下流蒲叛屬之巡撫蔡懋德而
請濟師于朝遣副將熊通以二千人防河會平陽守陳
尙智已遣使迎賊諷通還說遇吉叱之曰吾受國厚恩
寧從爾叛逆且爾統兵二千不能殺賊反作說客耶立
斬之二月七日太原陷懋德死之賊遂圍代州遇吉先
在代過其北犯太原憑城固守而潛出兵奮擊連數日殺
賊無算會食盡援絕退保寧武賊亦踵至發大砲殺賊
萬人火藥且盡外圍轉急或請甘言給之遇吉怒曰若
輩何怯耶今能勝一軍皆忠義卽不支縛我于賊於是
設伏城內出弱卒誘賊入城亟下閘殺數千人賊用砲

攻城圯復完者再傷其四驍將自成懼欲退其將曰我衆百倍于彼但用十攻一番進靡不勝矣自成從之前隊死後復更進官軍力盡城遂陷遇吉巷戰馬蹶徒步跳盪手格殺數十人身被矢如蝟竟爲賊執大罵不屈賊懸之高竿叢射殺之復斮其肉城中士民感遇吉忠義咸巷戰殺賊不可勝計其舍中兒先從遇吉出鬪死亡畧盡妻劉氏素勇健率男女數十人據山巔公廨登屋而射每一矢斃一賊賊不敢逼縱火焚之闔家盡死自成集衆計曰自此歷大同陽和宣府皆有重兵倘盡如寧武吾部下寧有子遺哉不如還秦休息圖後舉而大同總兵姜瓖降表至宣府表繼至遂決策長驅賊每語人曰他鎮復有一周總兵吾安得至此

應時盛遼陽人起家小校至都督僉事山西巡撫中軍副
總兵慷慨仗義都御史中丞蔡懋德深倚之闖賊犯太
原勢危急部下數人謀亂時盛廉得誅之誓衆死守賊
帥陳某與時盛有舊于城下誘降時盛以神鎗擊中賊
裹甲帥嚙指而退城陷復下城巷戰突殺數十人賊騎
充斥知不能免遂同中丞至三立書院曰請與公俱死
先扶蔡就縊北向再拜引弓絃自絕

國朝

馬柱國遼東人順治元年巡撫山西時流寇據太原城八
月死亡以數十萬計遺黎畧無生意柱國統兵至一鼓
破之搜餘孽殆盡始入城輒督兵登陴俾無得入民室
安集撫循民稍復業時客兵亟往返供億滋衆柱國先

具牛酒迎郊外慰諭再四俾無譁無掠以驚殘氓雖征調頻仍而里閭若不知有兵者二年遷陽和總制以去黃徽孕晉江人順治元年以進士巡按山西時三晉初定民多竄居山谷徽孕單騎入險阻慰諭俾復業先是闖逆據晉賦役業入強半至是特疏以聞凡僞官嘗徵者胥爲豁免而晉民之死義者胥以其狀上又嘗綜三晉情勢疏陳四事一曰薦遺佚以求錄用一曰立師儒以育賢才一曰禁訐告以安窮黎一曰復站銀以蘇驛困疏入次第舉行當時稱爲訐謨焉

申朝紀遼東人順治二年巡撫山西下車糾劾墨吏十餘人羣僚肅然站銀舊額一十五萬明季裁充餉驛費不足派之里甲至二十萬有奇朝紀廉得其狀疏請仍歸

正項驛馬官牧養無得派民勒石郡邑至於清獄囚裁
吏典禁胥役私禁人犯革募夫簽報里民胥有實惠晉
人立祠祀之

孫茂蘭遼陽左衛人順治四年以生員任山西布政使時
朝議以太原重地特令滿兵駐防所圈民地胥以廢藩
土田給之而屯丁多抗不予租民莫敢誰何茂蘭痛繩
以法始獲安本業滿兵間與民爭所司率分左右袒茂
蘭用情理訊之俾各厭其意以去兵民咸安蒞任六年
擢寧夏巡撫去之日攀轅泣送者不絕

祝世昌遼東人順治六年巡撫山西時姜逆作亂晉省震
動世昌性激烈凡從賊棄城者率竿諸城力請

大兵殄滅需餉數十萬殫慮經畫軍有餘糧民亦不病科

九原府志 卷三十一
李
擾事平特疏請豁賦七百萬石徭十萬餘丁民獲少蘇
無何病卒卒之日百姓巷哭後劉撫軍宏遇博採輿論
謂死忠死事其義一也祀忠烈祠

劉宏遇遼東人順治七年巡撫山西時姜逆初平邨聚多
蹂躪而逋賦如山積宏遇疏請豁民寢蘇又恤諸死事
家建忠烈祠祀之辛卯鄉試直指以艱愆期捐俸分給
埃試士俾無寒餒壬辰饑遣使散賑復煮粥城中全活
者甚衆修文廟鑄祭器立義塚設養濟院補城東南樓
治宜春拱極迎澤門橋築堤以障汾流俾無嚙城實政
次第舉而絕饋遺清衙蠹革市行尤爲拳拳旣去民懷
其德建祠以報

劉嗣美河南陳留人順治九年以進士巡按山西性剛毅

彈劾雖權貴不避巡部時微行訪民疾苦奸胥墨吏憚之弁卒曩占居民室民惴惴不敢出一語嚴爲科條令胥出賃直草豆輸會城市雖緣典守以肆勒索廉得其狀立斃之飭州縣徵賦行易知單民便之其他懲蠹役裁徭夫甦驛困革行戶民胥感頌焉

李之芳字鄴園山東武定州人順治十六年以進士巡按山西貪墨吏多歛跡而措置鉅細務雅有條理尋以缺裁去後爲浙閩總督平耿逆之亂累官大學士卒諡文襄

王庭字言遠浙江嘉興人已丑進士順治十六年任山西右布政使性孤潔以冰蘖之操倡屬吏有晉謁者輒勗令牧養百姓慎出納吏不得上下其手藩司甚煩劇庭

方原府志 卷三十二
處以清嚴內外肅然放衙後輒顧四歲孫握筆作大字
灑然樂之尋以裁缺去庭工制義與熊劉齊名晉人士
多能誦其文者而閭巷亦歌詩不輟焉

李進忠順治間任撫標右營中軍守備死姜逆之亂祀忠

烈祠

董廷儒順治間任督標營旗鼓守備死姜逆之亂祀忠烈

祠

劉元勳咸陽人順治己亥進士康熙間任山西糧驛道以
養馬費有正供而晉皆民養嚴禁之委賑大同無漏無
冒駐節地有槐一章民號爲劉公槐尋致政歸

穆臣滿洲人康熙十五年任山西按察使持法能平遇訟
者輒以善言解之獄囚銀米必親詣按名以給

巴哈布滿洲人康熙三十七年任山西按察使精敏仁恕持法能平而義所不可雖抗論大吏前不少撓尤加意作人立義學捐俸增修貢院號舍

諾岷滿洲正藍旗人性耿介雍正元年以署工部右侍郎巡撫山西先是州縣侵那錢糧者甚多岷力爲振刷相地之繁簡與員之能否互易其位以相鈎馭月要歲會胥吏無所售其奸宿弊一清正已率屬吏肅民懷在任年餘移疾去

喀爾吉善正紅旗人乾隆五年任山西巡撫爲政不事苛察儉以自奉仁以愛民

德沛宗室乾隆十二年巡撫山西外渾厚而內精明接僚屬溫容霽色有過者毫髮不容寬假政肅民安

胡寶璪安徽歙縣人舉人乾隆十七年巡撫山西和平雅
靜待士優禮政令不擾操守尤廉與人相接如光風霽
月

明德正紅旗人兩任山西巡撫豁免負累深得民心緣同
官罣誤士民千餘泣保得免後復任入境時男婦歡迎
道路擁擠

塔永寧正紅旗人生員乾隆二十二年巡撫山西正直剛
方除暴安民

多綸鑲白旗人乾隆十六年任山西布政司工書簡默厚
重人稱爲多佛

唐綏祖江都人進士先任江西巡撫及湖廣總督晚年
骨愈峻除暴鋤奸不畏疆禦愛民如子遇有疑案虛

研鞫不惜再三在晉司臬數載無冤獄吏胥見之不寒而慄有鐵面冰心之號

黃祐新城人進士乾隆十二年任冀寧道博學多才清潔自奉時詣書院訓課諸生手批口授及去諸生立碑三立祠

喬光烈上海人進士剛方正直廉能出衆吏胥無敢稍干法紀先任河東道儉約自守不攜眷屬割行戶緝刁民接士有吐握之風署冀寧道未數月調直省鹽道民送之數十里官至湖南巡撫